



PENDUDUK Perumahan Awam Sri Sabah 3B berarak sambil berselawat pada majlis sambutan Maulidur Rasul 1430 di kawasan perumahan itu di Cheras, kelmarin.

Penduduk Sri Sabah 3B anjur Maulidur Rasul

KUALA LUMPUR 23 Mac – Lebih 300 penduduk Perumahan Awam Sri Sabah 3B di sini menyertai perhimpunan dan perarakan sempena sambutan Maulidur Rasul 1430 di sini semalam.

Mereka membawa sepanduk mengandungi puji-pujian terhadap Rasulullah SAW sambil berselawat bermula dari kawasan dataran perumahan itu menuju ke surau Tarbiyah Sri Sabah.

Sambutan itu dirasmikan oleh Pengurus Zon Satu, Jabatan Perumahan Dewan Bandaraya Kuala Lumpur (DBKL), Saida Ngah Hazali.

Pihak DBKL turut menyumbangkan seekor lembu untuk jamuan serta membantu dari segi kemudahan logistik.

Pengerusi Persatuan Penduduk Sri Sabah 3B, Zainal Abidin Abdul Wahab berkata, sambutan itu bertujuan

memperingati perjuangan dan sejarah kehidupan Nabi Muhammad SAW.

Menurutnya, melalui sambutan itu juga, penduduk dapat memupuk semangat perpaduan dan mengeratkan lagi silaturahim.

“Sambutan ini akan mewujudkan rasa cinta, harmoni dan silaturahim antara penduduk perumahan ini dan cintakan Islam yang dibawa oleh Rasulullah,” katanya ketika ditemui Utusan Malaysia di sini.

Sambutan yang sederhana tetapi meriah itu turut diserikan dengan majlis cukur jambul melibatkan 13 orang bayi dan juga majlis marhaban.

Zainal memberitahu, pihaknya akan menganjurkan lebih banyak aktiviti kemasyarakatan pada masa akan datang untuk mengeratkan hubungan sesama penduduk.